

Pisortat illuutaat A/S Ini-miit aqunneqartut suli imermut attaveqanngitsut tamarmik attavilersorneqarnissaasa pilersaarusiornissaa siunertaralugu Naalakkersuisut suliassamik piareersaasioqqullugit peqquneqarnissaannik Inatsisartut aalajangiiffigisassaattut siunnersuut

(Inatsisartuni ilaasortaq Doris Jakobsen, Siumut)

Akissuteqaat

(Ineqarnermut, Pinngortitamut Avatangiisinullu Naalakkersuisoq)

Siullermeerneqarnera

Inatsisartuni ilaasortaq Doris Jakobsen aalajangiiffigisassatut siunnersuuteqarnerani qutsavigaara.

Siunnersuuteqartoq Namminersorlutik Oqartussat inissiaataanni, A/S INI-mit aqunneqartuni tamani qanoq iliorluni imermut attavilersuisinaanissamut Naalakkersuisut iliuusissanut pilersaarusiornissaannik siunnersuuteqarpoq.

Imerk pilersuinerup ineqarnermut sanaartornernullu aningaasaliissutinik pingaarnersiulluni tulleriiaarnermut ilanngunneqarnissaata pingaaruteqarnera pillugu Naalakkersuisut siunnersuuteqartoq isumaqatigaat.

Kisiannili misilittakkat takutippaat, iliuusissanut pilersaarutinik teknikkikkut sukumiisortaannut immikkoortiterlugit atorsinnaasunik suliaqarneq aningaasartuuteqarfiungaatsiartartoq.

Aallarniutigalugu inissiat qanoq amerlatigisut imermillu pilersorneqanngitsut sumi inissisimanersut paasiniarneqartussaavoq. Maannamut kisitsisaatigineqartut takutippaat illut ilaqutariinnut ataatsinut inissiat ilullu affarleriit Namminersorlutik Oqartussanit pigineqartut, A/S INI-mit aqunneqartut 96%-iisa missaat ukioq kaajallallugu imermik pilersorneqartut. Inissiat sinneri 4%-it missaanniittut imermut tankinit pilersorneqarput, taakkulu nalinginnaasumik tassaasarput nunaqarfinni inissiat ataasiakkaat aammalu inissiat isorliunerusuniittut.

Tulliullugu illoqarfinni nunaqarfinniluunniit ataasiakkaani imermik pilersuinerup misissuiffigineqarnissaa pisariaqartussaavoq. Illoqarfimmi nunaqarfimmiiluunniit imermut imigassamut isumalluutit pinngortitameersut naammaginartumik annertussuseqarpat? Imeqarfiup allilerneqarnissaa pisariaqartinneqarpa, tarajuaavimmik sanasoqassava il.il.?

Taakku naammassineqariarpata, inissiat ataasiakkaat najukkami imermik pilersuivimmiit imermik pilersorneqarsinnaanersut, inissisimaffii aammalu erngup aqutaata annertussusilernissaa il.il. misissuiffigineqartussaapput.

Pissutsinik taamaattunik misissuisarnerup qanoq akisutigineranut paasissutissiiniarlunga ilisimatitsissutigisinnaavara, Nukissiorfiit Ikamiuni imermik pilersuinerup misissuinissaannarmut 400.000 koruuninik immikkoortitsisimmata. Kisitsisit taakkua Nukissiorfiit ullumikkut illoqarfinni 17-ini nunaqarfinnilu 53-ini imermik pilersuineranut atatillugit isigineqassapput.

Naqitsineq atorlugu inoqutigiinnut imeqartitsineq imermik atuinermik annertusititsisinnaavoq, taamaalillunilu imeq nunamut kuutsinneqartartoq annertusitinneqarsinnaalluni, tamatumani lu eqqiluisarneq eqqorneqassaaq. Taamaattumik erngup errortuivikup minguttunillu errortuivikuusinnaasup annertunerulersup iliuuseqarfiginissaanut kuuffeqarfilersuinerup aningaasaliinissaq pisariaqalersinnaavoq. Taamaattumik iliuusissanut pilersaarusiorneq

toqqaannangitsumik kommunit, imermik errortuivikumik isumaginnittut aningaasartuuteqarnerulerinerinik kinguneqarsinnaavoq.

Taakku imermik pilersuinermi iliuusissanut pilersaarusiamik suliaqartoqarnerani pissutsinut – allanngorartumik annertussusilimmik – ilanngunneqartariaqartussanut assersuutaapput. Tamatuma kingunerisaanik iliuusissanut pilersaarusiornermut aningaasartuutissat siunnersuummi missiliorneqartunit amerlanerujussuanngornissaat naatsorsuutigineqarpoq.

Tamanna tunngavigalugu Naalackersuisut allannguutissatut siunnersuummik imaattumik saqqummiussissapput:

”Pisortat illuutaat A/S INI-miit aqunneqartut suli imermik pilersuiffimmut attavilerneqanngitsut tamarmik imermik pilersuiffiliorfigineqarsinnaanissaannik pilersaarusiornissaq siunertaralugu, iliuuseqarnermut pilersaarummik suliaqarnermi annertussusissaata aningaasartuutissallu misissornissaannik Naalackersuisut peqquneqassasut Inatsisartut aalajangiiffigisassaattut siunnersuut.

Siunnersuut Sanaartornermut Ataatsimiititaliami suliarineqarnissaanut innersuunneqassasoq Naalackersuisut inassutigaat.